

清

史

稿

清史稿

列傳二百四十七

左寶貴

永山

鄧世昌

劉步蟾

戴宗騫

左寶貴字冠廷山東費人咸豐初隸江南軍營令當前敵陣既接旗兵中礮聲
寶貴持其幟衝鋒入大捷繇是知名獲苗沛霖克金陵頗有功效後以游擊從僧
格林沁討捻積勛至副將光緒初尙書崇實巡視奉天吉林奏自隨既至斬高
希珍於土門誅宋三好於石砬子邊外東北廟溝金宮四構黨圖大舉復捕治
之餘燼悉平賜號鏗色巴圖魯管記名提督授高州鎮總兵仍留奉天平朝陽
教匪賞黃馬褂雙眼花翎駐濟陽二十年朝鮮亂起日本進兵朝議既決戰衛
汝貴馬玉崑豐紳阿各率所部往禦之寶貴自奉天來會是爲四大軍慮海道
梗迺繞道自遼東行渡鴨綠江入平壤是時葉志超虛飾戰勝狀電李鴻章入
告遂拜總統諸軍命於是汝貴玉崑軍南門外大同江志超部將江自康軍北

門外小山寶貴任城守未止舍日軍猝至寶貴與豐紳阿擊卻之敵退龍岡分道來攻又敗之志超迺聚全軍爲嬰城計時寶貴扼元武門日軍大隊至志超將潰圍北歸寶貴不從以兵守志超勿令逸寶貴狙於捕馬賊之功頗輕敵日軍舉礮散置山巔謀者以告若弗聞登城指麾中礮踣猶能言及城下始殞其部將負屍開城走遇日軍又乘之於是諸軍皆潰事聞贈太子少保諡忠壯予騎都尉兼一雲騎尉世職子國柱襲弟寶貴寶清先後於直隸奉天勦匪陣亡永山袁氏漢軍正白旗人黑龍江駐防吉林將軍富明阿子黑龍江將軍壽山弟以蔭授侍衛歸東三省練軍中日戰起從將軍依克唐阿軍率黑龍江騎旅駐摩天嶺永山臨敵輒深入爲士卒先與日軍戰數有功連殲其將既克龍灣乘勝渡草河規鳳凰依克唐阿策襲其城檄永山爲軍鋒借壽山分率馬步隊深入攻之抵一面山距城八里張左右翼各據一坡以待永山爲右翼尤得地勢敵作散隊伍什什冒死前後以大隊橫衝我左翼左翼潰右翼亦不支乃相繼退永山獨爲殿遇伏連受槍傷洞胸踣復強起督戰大呼殺賊而逝事聞

設壯愍予建祠奉天

鄧世昌字正卿廣東番禺人少有幹略嘗從西人習布算術既長入水師學堂精測量駕駛光緒初管海東雲艦檄循海口日本窺臺灣扼澎湖基隆諸隘補千總調管振威艦以捕海盜邊守備李鴻章治海軍高其能調北洋從丁汝昌赴英購鐵艦益詳練海戰術八年朝鮮內亂復從汝昌泊仁川爲吳長慶陸軍後距事甯遂游擊賜號勃勇巴圖魯管揚威快艦往來天津朝鮮冬寒冰沍巡視寧厦海防尋充經遠致遠靖遠濟遠四船營務處兼致遠管帶十四年臺灣生番畔以副將從汝昌往討戰埤南毀其碉寨擢總兵時定海軍經制借補中軍副將而以汝昌爲提督其左右翼總兵則閩人林泰曾劉步蟾也汝昌故不習海戰威令不行獨世昌以粵人任管駕非時不登岸閩人咸嫉之二十年夏日侵朝鮮海道鴻章令濟遠廣乙兩船赴牙山遇日艦先擊廣乙受殊傷轟濟遠都司沈壽昌守備楊建章黃承勳中礮死濟遠逃日艦追之管帶方柏謙暨白蟻迫益亟有水手發礮擊之折日艦瞭樓柏謙虛張勝狀退塞威海東西兩

日世昌憤欲進兵汝昌尼其行不果已而日艦集大連灣窺金州我國海軍迺大發泊鴨綠江大東溝以鐵艦十當敵艦十有二汝昌乘定遠居中列諸船左右張兩翼日艦魚貫進據上風汝昌令轟擊距遠不能中日艦小運掉靈倏分倏合彈雨盆集定遠被震大轟仆世昌見帥旗沒慮軍心搖亟取致遠轟擊之戰良久定遠擊沈其西京丸我之超勇燬焉世昌乘致遠最猛鷲與日艦吉野浪速相當吉野日艦之中堅也戰既酣致遠彈將罄世昌誓死敵將士知大勢敗陣稍亂世昌大呼曰今日有死而已然雖死而海軍聲威弗替是即所以報國也衆迺定世昌遂鼓輪怒駛欲猛觸吉野與同盡中其魚雷鍋船裂沉世昌身環氣圈不沒汝昌及他將見之令馳救拒弗上縮臂出圈死之其副游擊陳金揆同殉全船二百五十人無逃者經遠管帶總兵林永升超勇管帶參將黃建寅揚威管帶參將林煥中並殞於陣事聞世昌諡壯節餘皆優卹世昌既死諸船或沈或逃遂不復成軍世昌臨戰以忠義相激厲死狀尤烈世與左寶貴並稱雙忠云永升等忠義有傳

劉步蟾侯官人幼穎異肄業福建船政學堂卒業試第一隸建威船徵循南洋資質練同治十一年會考閩廣駕駛生復冠其曹白是巡歷海岸河港所莅輒用西法測量臺灣地勢番部風土尤諳習爲圖說甚晰光緒改元赴歐學槍礮水雷諸技還留福建叙守備以丁寶楨李鴻章論薦擢游擊會辦北洋操防十一年赴德國購定遠艦維時海軍初立借才異地西人實爲管帶步蟾副之已而西人去頗能舉其職十四年以參將赴歐領四快船歸遂副將賜號強勇巴圖魯擢右翼總兵二十年中日戰起海軍浮泊大東溝日艦至督攝諸藝士禦之鏖戰三時許沈敵艦三艘運送銘軍八營得以乘閒登岸論功晉記名提督易其勇號曰格洪額明年戰威海中彈死步蟾通西學海軍規制多出其手顧喜引用鄉人視統帥丁汝昌蔑如也時論責其不能和衷致值事然華人明海戰術步蟾爲最先雖收挫殺敵甚衆上嘉其忠烈詔優卹其左翼總兵林泰曾亦籍侯官同爲船政學堂卒業生管領遠戰大東溝發礮敏捷士卒用命撲救火彈甚力機營礮位無少損賜號霍春助巴圖魯駛還威海艦觸礁受傷憤

恨蹈海死副將左翼中營游擊楊用霖廣東大鵬協右營守備黃祖蓮並殉焉
優卹各如制祖蓮等忠義有傳

戴宗騫字孝侯安徽壽州人少以廩生治鄉團捻曾苗沛霖數陷州宗騫潛結
各圩寨以攜貳其黨同治初謁李鴻章上平捻十策深器之遂留參戎幕積助
至知縣十一年治南運河隄工時饑輔興水利計臣慮饑詘議裁兵宗騫上書
略謂津沽爲九河故道漳衛交匯水蓄衍溢宜闢減河洩其勢斯枝河分其漲
俾淮練軍治之則兵農合一事半而功倍鴻章以其議上聞遂命董其役成稻
田六萬餘畝箸海上屯田志紀其事光緒八年中俄失和吳大澂被命佐吉林
邊務奏宗騫自隨大澂兼攝屯政宗騫爲治道路築礮臺設江防徙直東流民
假予產業分部護之塞外灌莽千里馬賊爲民患宗騫曰此屯政蠹也率將士
步馳八九百里獲渠率王林等駢誅之又以綠邊荒且戶籍殘耗客民渙居不
相顧因令屯聚一處略仿內地保甲杜絕姦宄復設製造局採金廠行之期年
商民輻湊大激上其績狀遷知府八年徙防洋蒲河兩海口遭母憂歸鴻章疏

留宗騫請終制弗許時興海軍練水師闢軍港撤防威海十三年詣軍所壁金
縷頂山分鞏軍駐南岸綏軍駐北岸明年建兩岸海臺各三南曰趙北嘴鹿角
嘴龍廟嘴北曰北山嘴黃泥崖祭祀臺後路分築陸臺四南岸口較闊更建日
島地阱礮臺屹然爲東防重鎮十七年校閱海軍禮成論功晉道員威海地瘠
士氣衰更斥資立義塾延名師至是始聞謳誦譬二十年夏日艦來攻率師禦
之傷其艦四艘再至再敗之既而旅順大連相繼淪沒威海勢益孤電請北洋
山東益師久弗應其冬連失文登甯海時宗騫守北岸分統劉超佩守南岸宗
騫與約寇至互相應歲除大風雪戰橋頭集綏軍大困銳身救之出諭歲日軍
至輒敗去折而南宗騫往援而超佩踰阻遁三臺拱手讓敵反訴巡撫李秉衡
誣宗騫背約宗騫抗辯愿復三臺贖罪迺募敢死士奪還二臺唯龍廟嘴未復
日軍倏大集二臺仍不守宗騫退歸登祭祀臺所部卒譁變宗騫伴弗省行數
武槍齊發材官追斬一人衆散走宗騫既登迺無一從者夜宿藥庫丁汝昌詣
籌戰守策宗騫曰綏鞏軍已西去孤臺危棘恐資敵汝昌令燬臺強掖之下宗

竊念南北各有地阱臺此其勢尙可爲迺詣劉公島就副將張德山德山無戰守志宗竊飲金死威海師遂燬鴻章以死事聞詔優卹復以秉衡請贈太常寺卿

論曰中東之戰陸軍皆遁寶貴獨死平壤海軍皆降世昌獨死東濤中外傳其壯節並稱雙忠及日兵入奉永山獨死鳳城敵遂長驅進矣旅大旣失威海勢孤步蟾宗竊皆先後誓死士氣如此豈遂不可一戰此主兵者之責五人雖敗猶有榮焉

清史稿

列傳二百四十八

宋慶

呂本元

馬玉崑

依克唐阿

榮

長順

宋慶字祝三山東萊州人家貧落魄聞同里宮國勳知亳州往依爲奴毫捻孫之友僞就撫慶察其意叵測請擊之國勳壯其志署爲州練長之友降遂接統其衆號奇勝營薦授千總自是宿州剿豫匪釋鳳陽圍保徐泗後路踰三歲擢至總兵賜號毅勇巴圖魯既貴過亳謁所主仍易僕斷服執事上禮益恭人傳爲美談同治改元唐訓方撫安徽裁臨淮軍而以三營屬慶毅軍自此始三年苗沛霖圍蒙城慶絕其饋道會僧格林沁軍至轟擊之寇宵遁苗曾死慶爲安撫餘衆自壽州正陽關所莅皆下兩淮告甯調赴豫時張曜爲翼長慶往訪詳詢地勢寇情躍喜曰諸將無問及此者君來豫之福也遂與交驩明年授南陽鎮總兵無何曹州賊勢熾慶被困鄧州刁河店會糧罄勢且不敵迺令部將馬玉崑率壯士三百潛出立營通饋軍氣復振寇迺解去已而張總愚決河

圖北犯慶據隄迎擊敗之西走而任柱賴文光復竄豫湘軍將劉松山助慶軍
盡驅入楚疆豫略平巡撫李鶴年因增練兩大軍令隴領嵩武軍而以毅軍專
屬慶六年與隴扼黃河蹙捻至山東衆而殲之論功賞黃馬褂更勇號格洪額
時總愚南擾河津偃解州詔慶與隴分守河北踰歲捻竄畿疆慶率師入衛轉
戰雄任祁高問與諸軍大破之總愚赴水死予二等輕車都尉授湖南提督八
年左宗棠西征慶引兵從抵神木再戰再捷明年秋命參哈甯剿匪事旋移督
西川皆在軍遙領十三年河狄撫回閃殿臣叛楚軍戰失利時慶駐涼州奉檄
往援三日馳五百餘里抵沙泥站衆縛其渠以獻誅之事遂定光緒元年師還
六年徙防旅順十餘年軍容稱盛醇賢親王奕譞被命巡閱款爲諸軍冠親解
袍服贈之兩宮眷遇優渥加太子少保尙書銜二十年中日失和慶統毅軍發
於旅順與諸軍期會東邊九連城軍未集而平壤已失廷旨罷總統葉志超以
慶代之慶與諸將行輩相若驟稟節度多不懌以故諸軍七十餘營散無有紀
又坐守江北一月以待日軍過義州慶賴中路九連城嚴誠備日軍渡鴨綠江

戰失利直趨鳳凰城退扼大高嶺旅順圍亟朝命聶士成守之敕慶往援頓蓋平屢擄金州不得進而旅順已失慶退守熊岳自請治罪被宥未幾復州又失日軍西陷海城慶亟赴之擊敵咸王寨前軍方勝後隊訛傳敵拊背駭潰復退守田莊臺遼陽益危慶凡五攻城弗能拔朝廷思倚湘軍命慶與吳大澂佐劉坤一軍慶率徐邦道馬玉崑兵萬二千人頓太平山戰卻之大激敗入關慶方以三萬人駐營口聞警還扼遼河北岸而日軍盡以所獲礮列南岸猛攻慶軍潰而西於是遼河以東盡爲日有矣詔褫職留任二十四年徙守山海關入覲釋處分和議成留豫軍三十營屬之賜名武衛左軍駐錦州二十八年卒晉封三等男予建祠諡忠勤子天傑五品京堂襲爵慶從戎久年幾八十短衣帕首踐踏冰雪中與士卒同甘苦人以爲難云呂本元安徽滁州人初隸李鴻章軍隨剿粵匪擒匪轉戰蘇皖魯豫各省援鄂援陝屢立功歷保總兵賞強勇巴圖魯勇號鴻章總督直隸調入直光緒初授四川重慶鎮仍留統盛軍馬步各營中日戰起檄本元統隊出關兼程至安州平壤失從宋軍退守大高嶺本元令

各軍夜樹旂各要隘廣設疑兵凡二百餘里敵至疑頓不前乘其疲襲擊之復與諸軍敗之分水嶺議成還直二十六年拳禍起署天津鎮擢直隸提督統淮練各軍剿匪受彈傷事平賞黃馬褂調浙江勳訓練尤嚴治盜常親督隊入山搜剿連斃匪首浙省議裁綠營本元贊畫始就緒宣統二年病乞罷尋卒徐邦道四川涪州人初從楚軍討粵寇積助至參將還本籍籌防解城圍還副將越境援陝西漢中賜號冠勇巴圖魯旋坐漢中失守褫職嗣從副將楊鼎勳援蘇再援浙閩以戰功釋處分同治六年從劉銘傳剿平東捻復官明年張總愚犯滅河邦道嚴扼橋口大敗之更勇號鏗僧額邊總兵署江蘇徐州鎮光緒四年擢提督調駐天津軍糧城授正定鎮東事起慶以旅順守將赴防九連城李鴻章別令姜桂題等守旅順邦道助之日軍入貔子窩邦道語諸將曰金州若失則旅順不可守請分兵禦之諸將各不相統莫之應邦道自率所部趨大連灣是時銘軍分統趙懷益守其地邦道至固請兵迺分步旅隨邦道行日軍大集遂占金州進偏大連懷益奔旅順越十日日軍來爭旅順諸將相顧無措邦道

率殘卒至憤甚思自效請增兵不許請械許之迺率衆拒戰土城子挫之日軍大至迺退道員龔照喚先一日通諸將亦奪民船以濟蓋日軍未至而旅順已墟矣邦道奔復州依慶詔褫職慶令守蓋州邦道自牛莊移師還而蓋平亦已失合章高元擊之弗勝桂題往援邦道請夜搗蓋平桂題辭諸軍皆退營口邦道迺從慶擊敵太平山與玉崑力戰卻之俄仍敗潰復與湘軍將李光久攻海城亦弗克遂退踰歲卒復官予優卹

馬玉崑字景山安徽蒙城人以武童從宋慶攻捻積功至都司賜號振勇巴圖魯任柱等因慶登州玉崑銳身馳救圍立解繇是以驍果名捻平擢總兵剿秦隴回數獲勝更勇號曰博奇旣克肅州賜頭品服嗣從金順出嘉峪關連下烏魯木齊昌克瑪納斯禽其渠黑瞎子天山南北告甯賞黃馬褂予世職玉崑居西域先後十餘年收復名城以十數暇輒使部下屯墾闢地利李鴻章疏薦將才謂可繼宋慶光緒間調赴直隸二十年補授山西太原鎮會日朝構衅玉崑統毅軍赴援次平壤壁南門外大同江日軍來攻玉崑守東岸血戰久援至敵

敗去己而元武門失葉志超令其速徹軍迺歸平壤日軍占蓋平諸將皆退營
口玉崑從慶頓太平山日軍猛攻之玉崑戰最力擊退其衆無何日軍大集慶
陷重圍墜馬負創玉崑扶圍入翼之山傷亡殊多轉戰田莊臺咸立寨以千餘
人抗強敵屹然自全二十五年擢浙江提督明年調還直隸適拳匪肇亂聯軍
入寇玉崑統武衛左軍禦之初戰天津繼戰北倉相持月餘卒以無援退車駕
西幸命隨扈又明年還京加太子少保二十八年朝陽土寇竊發玉崑倍道應
赴破其卡生禽首惡鄧萊峯誅之三十四年病卒贈太子太保子二等輕車都
尉諡忠武

依克唐阿字堯山扎拉里氏滿洲鑲黃旗人吉林駐防以馬甲從征江南移師
討捻敗張落利於大回村濼溪口屢著戰績積勳至佐領同治初馬賊陷伊通
依克唐阿以少襲衆斬其酋劉果發等又破之昌圖攻克劉家店復長春廳遷
協領賜號法什尙阿巴圖魯搜捕殘匪獲白陵河焦西平管副都統十一年補
官黑龍江光緒五年移呼蘭呼蘭設副都統自此始明年母憂歸時俄人以議

改伊犁條約有違言烏里雅蘇臺參贊喜昌夙諗依克唐阿諳戰術請敕就近募獵戶守瑯春會吉林戒嚴依克唐阿遂募兵五千擇隘分守而自率師駐其地瑯春故重鎮其東南海參崴俄尤數窺伺廷議設副都統鎮之於是又改調瑯春十年被命佐吉林軍事十五年擢黑龍江將軍二十年日朝戰起依克唐阿請率軍自効乃進咸鏡道繞赴漢城迎擊上嘉之左寶貴軍失利平壤日軍西進命移駐九連城尋以日軍渡江來攻復令徙上游禦之依克唐阿與戰於蒲石河連克蒲石河口古樓子宋慶退駐大高嶺依克唐阿孤軍不能獨守遂退寬甸宋軍南援旅大聶士成軍接防乃定夾攻之約依軍由寬甸繞進賽馬集迎擊日軍先戰懸羊磗子連勝之草嶺河通遠堡草河口日軍大集橫斷聶依兩軍士成亟趨分水嶺附其背依軍還擊之陣斬一中尉又西而東大戰於金家河軍稍挫日軍先已占鳳凰城依克唐阿謀襲之分左右翼以進戰一而山敵來爭左翼潰右翼統領永山遇伏死依克唐阿保餘軍退詔革職圖後効踰歲海城陷遼西危棘詔責長順守遼陽依克唐阿助之發帑金五十萬濟依

軍既至議以攻爲守迺集諸將置酒取刀刺臂血攪而飲之相矢以死依軍遂
進取海城軍騰熬堡耿莊數戰弗勝會榮和至軍亟趣之出榮和先進北路奪
三卡其左樹木幽深令隱兵備抄襲而自列陣曠野伏槍以待日軍據山巔轟
擊我師彈落積雪中潰不發我師還擊仆者衆再發再仆衆爭傍山出伏槍具
舉死以百數榮和所部募自寒邊外善避擊傷者恆少所謂東山獵戶也是役
以千人抗日軍數千故依軍聲譽遠出諸軍上罷戰詔下日人將歸我遼東依
克唐阿力請三路分兵鎮懾稱旨又條上練兵隊築礮臺造鐵路製槍械開礦
產治團練六事朝旨以曠政尤要敕妥籌開採又明年晉頭品秩授鑲黃旗漢
軍都統其秋出爲盛京將軍既莅事糾貪墨整營制晰分釐稅歲增餉銀數十
萬復徹還金州奉軍杜俄人藉口境內稱治二十五年卒諡誠勇予建祠依克
唐阿勇而有謀性仁厚不嗜殺每有俘獲不妄戮一人轉戰吳皖魯豫先後救
出難民以十數萬計至今人戶祝之初與長順訂兄弟交長順兄事之及議遼
陽戰守語不協依克唐阿毅然獨任其難曰孰使我爲兄也者其雅量如此榮

和字育堂二等侍衛官至副都統戰後所部育字營多驕縱命李秉衡查辦革職治罪

長順字鶴汀達呼里勒貝爾氏隸滿洲正白旗世居布特哈起家藍翎侍衛隨文宗車駕狩熱河會馬賊陷朝陽從大學士文祥討平之嗣復從侍郎勝保征捻轉戰直魯皖豫以驍勇稱同治元年解潁州圍以功遷二等多隆阿主陝西軍事調赴軍至潼關大敗寇衆賜號恩特赫恩巴圖魯進攻咸陽馬家堡被巨創援至又大破之咸陽復首頭等二年悍回馬化隆據甯夏分其黨駐清水堡成犄角師久攻不下長順曰不先翦其羽翼城未可克也迺自靈州襲清水堡乘勝取甯夏拔之晉副都統賜頭品服時長順年未四十而戰常陷堅每當兵潰時或抄襲其後或橫阻其前俾潰者得整列以是常轉敗爲勝其旗幟尙白寇望見之輒呼曰小長將軍至矣相與戒勿犯其爲寇所憚若此六年移師蘭州時省城戎備寡回衆數千突來犯長順率百人隱小溝出不意疾擊之寇愕走又敗之平番皋蘭狄道旣復規取河州連破太子寺高家集被賞賚八年授

鑲紅旗漢軍副都統越二年出署烏里雅蘇臺將軍坐事免光緒二年復官左
宗棠調赴甘肅歷署巴里坤領隊大臣哈密幫辦大臣初新疆南路勘界議起
當事者與俄使相持久不決至是長順陟嶢巖披蒙茸獲見高宗御書界碑俄
使始無異辭迺定明年假歸歷授正白旗漢軍都統內大臣十四年出爲吉林
將軍既莅事賑菑荒維園法均釐權澄吏治清盜源整旗務境內一切皆治辦
又勦修吉林通志書成上之二十年日軍陷海城遼陽危朝命長順往援節制
奉天各軍並嚴詔遼陽有失唯長順是問時潰軍紛集遼城下署知州徐慶璋
方閉城不令入軍大閱會長順領百騎至斬鬪者一餘令還駐沙河先是長順
被命以軍五千分隊應赴先至者令壁本溪湖自輕騎入遼陽亂既定日軍謀
者亦不知其止百騎也第歸言某將軍至日軍遂止弗前遼陽乃保已而進攻
海城戰數日弗勝長順奏趣宋慶會師詔不許湘軍將陳提至又請劉坤一令
合攻亦未果及日軍繞道復攻遼陽適慶璋守岢峒峪長順與依克唐阿回援
得無恙和議成請疾歸二十五年復起吉林將軍拳亂作俄羅斯內犯奉天黑

龍江皆主戰長順獨持不可又上言拳匪不可恃東省鐵路隨地皆駐俄兵宜善爲編糜甯嚴守以待戰毋先戰以啟衅上嘉其老成持重奉吉軍事悉屬之戰衅既開奉黑皆罹災而吉林安堵人服其先見日俄之戰守中立獨無所犯三十年卒贈太子少保予一等輕車都尉諡忠靖入祀賢良祠長順聳幹頹而鬚眉灑然富膽略恒持短矛單騎穿賊陣爲士卒先往往以少制衆以奇制勝兼謀勇一時稱良將云

論曰中日之戰淮軍既覆湘軍隨之唯豫軍強起支撐慶與玉崑先後失利亦不復能自振焉東三省練軍自成軍後終未當大敵而依克唐阿長順一奮其氣遂保遼陽而無失中外稱之喪師辱國者數矣此固差強人意者哉

清史稿

列傳二百四十九

丁汝昌

衛汝貴

葉志超

丁汝昌字禹廷安徽廬江人初隸長江水師從劉銘傳征捻積勳至參將捻平賜號協勇巴圖魯晉提督光緒初留北洋差序赴英國購兵艦歷法德各營學廠局還綜水師八年朝鮮與美議互市請莅盟汝昌與道員馬建忠東渡監約既而朝軍譁變焚日使署遂率濟遠揚威二艦赴仁川漢城護商而日軍已先至汝昌還請益師隨統七艦以濟薄王京與吳長慶及建忠謁李應昱執以歸九年授天津鎮總兵會越南南定陷乘兵艦往江平及欽州白龍尾徼循海口賞黃馬褂十四年定海軍經制命爲海軍提督軍故多閩人汝昌以淮軍寄其上恆爲所制總兵以下多陸居軍士亦去船以嬉又值部議停購船械數請不獲蓋海軍廢弛久矣二十年賞加尙書銜朝亂再起汝昌欲至濟物浦先攻日艦將啓行總署電柅之逮日艦縱橫海上海軍始集大東溝鴨綠江口定遠爲

汝昌座船戰既酣擊沈其西京丸一棧已致遠彈藥盡被擊總兵鄧世昌戰死自是連喪五艦不復能軍汝昌猶立望樓督戰忽座船礮震暈而仆昇以下汝昌鑒世昌之死慮諸將以輕生爲烈因定海軍懲勸章程李鴻章上之著爲令旅順陷汝昌渡威海是時兩軍相去二百二十餘里朝士爭彈之視職逮問鴻章請立功自贖然兵艦既弱坐守而已逾歲日軍陷榮城分道入衛汝昌亟以木牌塞東西兩口復慮南岸三臺不守礮資敵欲毀龍廟臺礮陸軍統將戴宗騫電告鴻章責其通敵誤國不果毀待援師不至迺召各統領力戰解圍會日暮大風雪汝昌盡毀緣岸民船而南北岸已失日艦入東口猛攻定遠受重傷汝昌命駛東岸俄沈焉軍大震競向統帥乞生路汝昌弗顧自登靖遠巡海口日艦宵入口門擊沈來遠威遠衆益恐道員牛昶炳等相嚮泣集西員計議馬格欲以衆挾汝昌德人瑞迺爾潛告曰衆心已變不如沈船夷礮臺徒手降計較得汝昌從之令諸將同時沈船不應遂以船降而自飲藥死於是威海師燬焉事聞諸將皆被卹汝昌以獲譴典弗及宣統二年海軍部立舊將請賜卹

始復官

衛汝貴字達三安徽合肥人從劉銘傳征捻累遷至副將管總兵事平授河州鎮李鴻章薦其樸誠忠勇留統北洋防軍歷授大同甯夏諸鎮均未之官統防軍如故光緒二十年日朝戰起率馬步六千餘人進平壤臨行鴻章誠以屏私見嚴軍紀至牙山退成歡與日軍相見尋復趨平壤合大軍與副都統豐紳阿賴守城南江岸平壤朝舊京也聞我軍至爭攜酒漿以獻而軍士多殘暴掠財物役丁壯淫婦女汝貴軍尤甚殺義定朝民衆滋忿復餽軍精八萬運家軍大譁連夕自亂互相蹈藉時馬玉崑血戰大同江浮舟往援敵稍卻元武門嶺失即竄走鴻章方據葉志超牒奏捷俄而安東鳳凰陷踉蹌走岫巖岫巖陷走奉天朝士交章糾其罪詔褫職逮問汝貴治淮軍久援朝時年已六十矣其妻貽以書戒勿當前敵汝貴遇敵輒避走敗遁後日人獲其牘嘗引以戒國人明年鏢送京師按實論死其弟汝成官至總兵援旅順六統帥不相轄汝成與趙懷益爭毆鴻章函責之逮日軍至婁桂題等猶力禦而汝成已先遁詔逮治未蹤

獲迺籍其家後不知所終

葉志超字曙青安徽合肥人以淮軍末弁從劉銘傳討捻積功至總兵戰淮城被創仍奮擊卻之遂北天長又敗之汭河賜號額圖渾巴圖魯規南樂戰德平間瀕有功捻平留北洋光緒初署正定鎮總兵率練軍守新城爲大沽後路後徙防山海關李鴻章薦其優智略予實授十五年擢直隸提督越二年熱河教匪亂志超率師討之平建昌連克榆林沈家窩館貝子廟釋下長皋圍進攻烏丹城禽其渠李國珍磔之賞黃馬褂世職二十年朝鮮乞師鴻章令選練軍千五百率太原總兵聶士成頓牙山志超遲留不進鴻章責之不得已啓行而日軍已據王京要隘牙山兵甚單駐朝商務委員袁世凱數約志超電請北洋發戰艦赴仁山增陸軍駐馬坡鴻章始終欲據條約恐增兵爲彼藉口勿許並戒志超毋啓衅亡何高陞商輪運兵近豐島被擊沈士成謂志超曰海道旣梗牙山絕地不可守公州背山面江勢便利戰而勝可據以待援不勝猶得繞道出也志超從之日軍偏成歡士成以無援敗趨公州就志超而志超已棄公州開

道出漢陽東士成追及之當是時大軍集平壤迺卷甲而趨之二日始至志超以成歡一役殺傷相當鋪張電鴻章鴻章以聞獲嘉獎賞銀二萬犒軍拜總統諸軍之命志超意甚滿日置酒高會徒築壘環礮爲守日軍調至大同江爲我軍逐去遂以屢捷入告時統帥居城中日軍夾江而陣兩岸相轟擊東南二路戰少利志超莫敢縱兵趣回城日軍乘間以濟據山阜左寶貴出禦之被巨創志超將私逸寶貴不從以兵監之寶貴自守元武門嶺矢必死登城指麾爲礮所中而殞志超亟樹白幟乞罷戰日人議受降請帥兵歸弗許迺潛向北走朝兵銜之刺骨於其出城時槍擊之死者不可稱計日軍復要之山隘兵潰回旋不得出擠而死者相枕藉諸將盡委械而去於是朝境內無我軍矣志超奔安州士成謂安地備險奧可固守弗聽巡定州亦棄不守趨五百餘里渡鴨綠江入邊始止焉事聞奪志超職鴻章請留營効力弗許次年械送京師下刑部鞠實定斬監候二十六年赦歸歲餘卒

論曰甲午之役海陸軍盡覆辱莫大焉汝昌雖有罪而能以一死報國尙知畏

法汝貫志超喪師失地道臭隣邦覲然求活終不免於國典何其不知恥哉

清史稿

列傳二百五十

唐景崧

劉永福

唐景崧字維卿廣西灌陽人同治四年進士選庶吉士改吏部主事光緒八年法越事起自請出關招致劉永福廷旨交岑毓英差序景崧先至粵謁曾國荃聽其議資之入越明年抵保勝見永福爲陳三策謂據保勝十州傳檄而定諸省請命中國假以名號事成則王此上策也次則提全師擊河內中國必助之饒若坐守保勝事敗而投中國策之下也永福從中策戰紙橋敵潰爲作檄文布告內外檄出遠近爭響應越嗣君爲法魯莫能自振景崧乘間勸內附永福意猶豫景崧曰子能存亡繼絕即所以報故主也且阮福時已斃無背主嫌永福意稍動於是廣招戎幕謀大舉上念景崧勞賞四品銜景崧上書言越南牛載之內三易國王欲靖亂源莫如遣師直入順化扶翼其君以定人心若不爲藩服計不妨直取爲我有免歸法奪否則首鼠兩端未有不敗者也十年駐興化會北甯告急毓英令景崧導永福往援初桂軍黃桂蘭等方守北甯劉團被

困山西坐視不救永福憾之深至是景崧力解之始往並勸桂蘭離城擇隘而守弗聽景崧輕騎入諒山與徐延旭量戰守適扶良警請還犒劉軍行至郎甲涌球陷阻弗達回諒謂延旭曰寇深矣亟宜收潰卒定人心備棧糧集軍械分兵守險以保茲土於是令綜前敵營務阮巴塘嶺敵再至再卻之廣軍氣稍振會張之洞令其募勇入關迺編立四營號景字軍爲規越廣軍之一朝廷賞加五品卿景崧遂取道牧馬行千二百里箬壑深岨多瘴厲人馬顛隕不可稱計既至數挫敵鋒毓英高其能復以潘德繼演軍屬之兵力迺益厚進頓三江口逾月法人攻劉軍吳鳳典督景崧率談敬德馳救大捷敵既退遂先薄宣光城外地故荒服迺督軍開山斬道首龍州訖館司創設臺站演桂道始達已而軍其南門敵開壁出邊疾擊之逼城而壘槍彈雨盆攻益力是時天霖雨饑饉絕吏士無人色逾歲演軍丁槐攻城桂軍雖飢疲然猶據山巔轟擊法人殊死鬪不可收毓英慮其斷後援令勿拚孤注於是退頓牧馬有旨罷戰遂入關論宜光獲勝功賞花翎賜號霍伽春巴圖魯晉二品秩除福建臺灣道十七年遷布

政使二十年代邵友濂爲巡撫臺灣自設巡撫首任劉銘傳治臺七年頗有建設詳銘傳傳銘傳去友濂繼之丈地清賦改則啟徵迭平番亂建基隆礮臺及景崧蒞任日韓啟釁亟起籌防永福方鎮南澳景崧自與永福共事積不相能迺徙永福軍臺南而自任守臺北未幾而李文奎變作文奎故直隸匪從准軍渡臺居景崧麾下爲卒有副將余姓者緣事再革之文奎忿甚即撫署前斬其頭護勇內應爭發槍將入殺景崧景崧出叛卒見而怖之斂刃立並告無事景崧慰之翻令文奎充管官出駐基隆於是將領多離心兵浸驕不可制割臺議起主事邱逢甲建議自主臺民爭贊之迺建民國設議院推景崧爲總統和議成抗疏援贖遼先例請免割不報命內渡臺民憤迺決自主製藍旗上印綬於景崧鼓吹前導紳民數千人詣撫署景崧朝服出望闕謝罪旋北面受任大哭而入電告中外有遙奉正朔永作屏藩語置內外部軍部以下各大臣命陳季同介法人求各國承認無應者無何日軍攻基隆分統李文忠敗潰景崧命黃義德順八堵遠馳歸詭言獅球嶺已失八堵不能軍且日人懸金六十萬購

新 粵 和
一
總統頭故還防內亂景崧不敢詰也是夜義德所部譁變平旦日軍果占獅球嶺潰兵爭入城城中大驚擾亂客勇士勇互仇殺尸遍地總統府火發景崧微服挈子遁附英輪至廈門時立國方七日也二十八年卒

劉永福字淵亭廣西上思人本名義幼無賴率三百人出關粵人何均昌據保勝即取而代之所部皆黑旗號黑旗軍同治末法人陷河內法將安鄴搆越匪黃崇英謀占全越擁衆數萬號黃旗越王諭永福來歸永福遂繞河內與法人抗設伏以誘斬安鄴覆其全軍法人大舉入寇永福軍瀕挫越人懼迺行成而授永福爲三宣副提督轄宣光興化山西三省設局保勝榷釐稅助餉有黃佐炎者越駙馬以大學士督師永福數著戰功匿不聞永福銜之越難深國王責令佐炎發兵六調永福不至然越王始終思用之光緒七年法人藉詞前約互市紅河魯越王逐永福越王佯調解而陰令勿徒法大怒逾歲入據河內永福憤請戰出駐山西巡諒山謁提督黃桂蘭乞援助會唐景崧至而陳三策永福曰微力不足當上策中策勉爲之朝旨賞十萬金犒軍永福入貨爲游擊戰

懷德紙橋陣斬法將李威利越王封一等男既又敗之城下法人決隄掩其軍越人具舟拯之出退頓丹鳳與法人水陸相持苦戰三日部將黃守忠攻最力敵大創迺浮艦攻越都懸萬金購永福越乞降永福欲退保勝黑旗軍皆憤激守忠自請以全師守山西功不居罪自坐永福迺不復言退無何聞法軍至遂出駐水田中而軍已罷困及戰大潰退保興化九年法人要議越事岑毓英力言土寇可驅永福斷不宜逐上寤之命永福相機規河內並濟以餉十年毓英次嘉喻關永福往謁毓英極優禮之編其軍爲十二營法人聞之改道犯北甯永福馳援巡永祥金英法教民梗阻擊卻之比至粵軍已大潰永福奪還扶朗猛球礮臺俄北甯失力不支再還興化復以糧餉艱阻改壁文盤洲大灘候進止毓英奏言永福爲越官守越地分所應爲若畀以職將來邊徼海盜皆可驅策於是擢提督賞花翎而李鴻章堅持和議猶責其騷動已和局中變上令永福軍先進法人擾宣光永福窘地雷待之連日隱卒以誘敵不敢出復徒營偏城三戰皆利敵援至毓英遣水師泝河而上永福夾流截擊奪其船二十餘艘

斬馘數十級法人愕走逾月法艦入同章毓英遣將分伏河東西永福居中策應兩岸轟擊敗之復以全力阨河道十一年法軍攻左域守忠失同章不守諸軍敗挫永福退浪泊停戰詔已下未至猶大捷臨洮論勝宣臨功賜號依博德恩巴圖魯和議成法人要逐如故張之洞令永福駐思欽不肯行景崧危詞脅之乃勉歸於粵授南澳鎮總兵二十年中日衅起命守臺灣增募兵仍號黑旗景崧署巡撫徙其軍駐臺南及臺北陷景崧走臺民以總統印綬上永福永福不受仍稱幫辦日艦駛入安平口擊沈之攻新竹相持月餘兵疲糧絕永福使使如廈門告急並電緣海督撫乞助饑無應者而臺南土寇爲內間引日軍深入破新化陷雲林撥苗栗嘉義孤城危棘永福猶死守日臺灣總督樺山資紀貽書永福勸其去峻拒之日軍迺大攻城城陷永福亡匿德國商輪日軍大搜不獲內渡後詔仍守欽州邊境後卒於家永福骨瘦柴立而膽氣過人重信愛士故所部皆盡死力云

論曰清初平定臺灣用兵數十載始入版圖甲午議和遽許割讓天下莫不同

憤焉羣民奮起擁景崧爲總統建號永清此實國民自主之始七日遽亡景崧
初說永福王越乃自爲之竟不可以終日雖有知慧不如乘勢豈不然哉永福
戰越名震中外談黑旗軍輒爲之變色及其渡臺已多暮氣景崧又不與和衷
卒歸同敗此不僅一隅之失也惜哉

清史稿

列傳二百五十一

李端棻

徐致靖

子仁

陳寶箴

曾鈺

楊深秀

楊銳

劉光第

譚嗣同

字

林旭

康廣仁

李端棻字苾園貴州貴筑人同治二年進士選庶吉士授編修爲大學士倭仁尙書羅敦衍所器十年出督雲南學政值回寇亂後荒服道亘前使者試未徧端棻始一一按臨文化漸振光緒五年轉御史以叔父朝儀官京尹迴避改故官累擢內閣學士十八年遷刑部侍郎越六年調倉場前後迭司文柄四爲鄉試考官一爲會試副總裁喜獎拔士類典試廣東賞梁啟超才以從妹妻之自是頗納啟超議娓娓道東西邦制度維時康有爲上書請變法兼及興學二十二年端棻遂疏請立京師大學凡各省府州縣徧設學堂分齋講習並建藏書

樓儀器院譯書局廣立報館選派游歷生二十四年密薦康有爲及譚嗣同堪大用又以各衙門則例語涉紛歧疏請刪訂上尤善之詔趣各長官定期革前敝摺禮部尙書未幾有爲等敗端棻自疏檢舉詔褫職戍新疆中道遯疾留甘州二十七年赦歸主講貴州經世學堂二十三年卒宣統元年從雲南貴州京朝官請復官

徐致靖字子靜江蘇宜興人寄籍宛平光緒二年進士選庶吉士授編修累遷侍讀學士父憂服闋二十三年起故官致靖嘗憂外患日迫思所以爲獻納計子仁鑄時以編修督湘學倡新學書告致靖舉康有爲致靖遂上言國是未定請申乾斷示從違藉以覘上意未幾詔果求通才於是致靖奏有爲堪大用並及梁啟超黃遵憲等又連上書請廢制藝改試策論省冗官酌置散舉復以邊患棘宜練重兵力薦袁世凱主軍事上皆然其言敕依行罷斥禮部尙書許應駘等阻遏言路遂命致靖權右侍郎八月太后復出訓政參預新政諸臣皆獲罪致靖褫職坐繫尋定永遠監禁仁鑄亦罷官戍子聯軍陷京師致靖始出獄

待罪詔赦免卒年七十五

陳寶箴字右銘江西義甯人少負志節詩文皆有法度爲曾國藩所器以舉人隨父偉琳治鄉團禦粵寇已而走湖南參易佩紳戎幕軍來鳳龍山閣石達開來犯軍飢疲走永順募糧糧至不絕守益堅寇稍稍引去寶箴之江西爲席寶田畫策殲寇洪福瑱事甯敘知府超授河北道創致用精舍遴選三州學子延名師教之遷浙江按察使坐事免湖南巡撫王文韶薦其才光緒十六年召入都除湖北按察使署布政使二十年擢直隸布政使入對時中東戰亟見上形容憂悴請日讀聖祖御纂周易以期變不失常他所陳奏語甚多並稱旨上以爲忠命治精臺專摺奏事馬關和約成泣曰殆不國矣明年以榮祿薦擢湖南巡撫撫幕有任驕者植黨私利至即重治之直隸布政使王廉爲關說據以上聞廉獲譴覆按史念祖被劾事盡暴其任用非人狀念祖遂褫職繇是有仇直聲湘俗故聞僊寶箴思以一隅致富強爲東南倡先後設電信置小輪建製造槍彈廠又立保衛局南學會時務學堂延梁啟超主湘學湘俗大變又疏請釐

正學術及練兵籌款諸大端上皆嘉納敕令持定見毋爲浮言動並特旨褒厲之是時張之洞負盛名司道咸屏息以伺寶箴初縮鄂藩遇事不合獨與爭無私撓之洞雖不憚無如何也久之兩人深相結凡條上新政皆聯銜而鄂撫譚繼洵反不與會康有爲言事數見效寶箴素慕曾胡薦士因上言楊銳劉光第譚嗣同林旭佐新政上方詔求通變才遽擢京卿參新政於是四人上書論時事無顧忌寶箴又言四人雖才恐資望輕視事過易愿得厚重大臣如之洞者領之疏上而太后已出訓政誅四京卿罪及舉主寶箴去官其子主事三立亦革職並燬湘學所著學約界說劄記答問諸書初甯鄉已革道員周漢以張揭帖攻西教爲總督所治寶箴至漢復刊帖傳布寶箴令燬之漢敲燬帖者寶箴怒下之獄舊黨恨次骨然喜新之士亦以此翕然稱之寶箴既去諸所營構使於民者雖效益已著皆廢毀無一存云卒年七十黃遵憲字公度嘉應州人以舉人入貲爲道員充使日參贊著日本國志上之朝旋移舊金山總領事美吏嘗藉口衛生逮華僑滿獄遵憲徑詣獄中令從者度其容積曰此處衛生顧右

於僑居邪美吏謝遽釋之歷湖南長寶鹽法道署按察使時實箴爲巡撫行新政遵憲首倡民治於衆曰亦自治其身自治其鄉而已由一鄉推之一縣一府一省以迄全國可以成共和之邦治臻大同之盛軌于是略仿西國巡警之制設保衛局凡與民利民瘼相麗而爲一方民力能舉者悉屬之領以民望而官輔其不及焉尋解職奉出使日本之命未行而黨禍起遂罷歸著有入境廬詩草等

曾銖字懷清喜搭臘氏滿洲正白旗人父慶昫甯夏將軍以任子爲工部主事累遷郎中充軍機章京轉御史光緒九年出爲陝西督糧道西同各屬農民納糧例繳省倉道塗艱遠多弊竇設法清釐之民稱便三輔士風樸樸茲事苦窳延長安柏景偉咸陽劉光賈主關中書院督課實學士論翕然又設蠶桑局聘織師教以煮凍織染法歲出絲帛埒齊豫十三年遷按察使明年母憂解職服除起故官俄遷甘肅布政使二十四年調直隸迴避留本任擢湖北巡撫慨然曰時艱至此猶可拘成法不變耶於是假陝甘總督印上陳補官掣簽度支訟

清史稿卷一百一十五
三
獄四事宜變通成例厚植國本侍讀學士貽穀光祿寺少卿張仲忻彈其亂政
詔褫職始曾銖官京朝家貧貧餓居陋室及任外臺孜孜民事不顧問有無既
閒廢出入皆徒步陝民恆歲釀金濟之後益困至敝衣單下都市未幾卒宣統
改元總督端方爲奏復原官

楊深秀字儀村本名毓秀山西聞喜人少穎敏諳中西算術同治初以舉人入
貲爲刑部員外郎假歸值晉大饑閭閻命籌賑深秀條上改革差徭法因
少蘇光緒十五年成進士就本官遷郎中轉御史嘗言時勢危迫不革舊無以
圖新不變法無以圖存二十四年俄人脅割旅順大連灣深秀力請聯英日拒
之詞甚切直時朝廷銳意行新政而大臣恆多異議深秀迺與徐致靖先後疏
請定國是又以取士之法未善請參酌宋元明舊制釐正文體下其議於禮部
尙書許應騷心非之未奏也會議經濟特科務減額於是深秀合宋伯魯彈其
阻撓上令應騷自陳奏上勅康有爲黃緣要津請罷斥詞連深秀上不之詰也
御史文悌劾深秀傳布有爲所立保國會並暴有爲交通內外狀德宗責以代

人報復反獲咎深秀益感奮連上書請設譯書局派王公游歷各國並定游學
日本章程皆報可又請試庶官日番二十人料簡貞實而汰其庸憊能老不諳
時務者緣是廷臣益側目湖南巡撫陳寶箴圖治甚急中蜚語深秀爲剖辨之
上以特旨褒寶箴寶箴適得行其志八月政變舉朝惴惴懼大誅至獨深秀抗
疏請太后歸政方疏未上時其子駿田苦口諫止深秀厲聲叱之退俄被逮論
棄市深秀性鯁直嘗面折人過以此叢忌官臺諫十閱月封事二十餘上稿不
具存惟獄中詩三章流傳於世著有虛聲堂稿聞喜縣新志

楊銳字叔嶠四川綿竹人少雋慧督學張之洞奇其才招入幕肄業尊經書院
年最少嘗冠其曹優貢朝考得知縣之洞督兩廣從赴粵光緒十一年舉順天
鄉試考取內閣中書二十四年之洞薦應經濟特科又以陳寶箴薦與劉光第
譚嗣同林旭並加四品卿充軍機章京參新政召見銳面陳興學練兵爲救亡
策稱旨七月禮部主事王照上封事尙書許應駉等格不奏上聞震怒盡褫尙
書侍郎六人革職朝臣皆不自安上手詔密諭銳云近日朕仰觀聖母意旨不

欲退此老耄昏庸大臣而進英勇通達之人亦不欲將法盡變朕豈不知中國積弱不振非力行新政不可然此時不惟朕權力所不及若強行之朕位且不能保爾與劉光第譚嗣同林旭等詳悉籌議必如何而後能進用英達使新政及時舉行又不致少拂聖意即具奏候朕審擇不勝焦慮之至銳復奏言太后親挈大位授之皇上皇上宜以孝先天下遇事將順變法宜有次第進退大臣不宜太驟上是之已而太后再訓政諸言新政者皆予重誅銳既下獄自揣實無罪謂即訊不難白次日遽詔與光第等同棄市宣統改元銳子慶昶繳手詔於都察院請代奏始傳於世

劉光第字裴村四川富順人光緒九年進士授刑部主事治事精嚴因讞獄忤長官遂退而閉戶勤學絕跡不詣著家素貧而性廉介非舊交雖禮饋弗受獨與楊銳善通周官禮及大小戴禮記其應召也亦以陳寶箴薦然非其素志將具疏辭川人官京朝者力勸之一日召見力陳時危民困外患日迫亟宜慮懷圖治上稱善惟時言路宏啓臣民奏事日數百計光第竟日批答箴箴可否以

待上裁退語所親曰吾終不任此行當亟假歸矣未一月而禍作光第自投獄
臨刑協辦大學士剛毅監斬光第託曰未訊而誅何哉令跪聽旨光第不可曰
祖制雖盜賊臨刑呼冤當復訊吾輩縱不足惜如國體何剛毅默不應再詢之
曰吾奉命監刑耳他何知獄卒強之跪光第颯立自如楊銳呼曰裴村跪跪遵
旨而已迺跪就戮著有介白堂詩文集

譚嗣同字復生湖南瀏陽人父繼洵湖北巡撫嗣同少倜儻有大志爲文奇肆
其學以日新爲主視倫常舊說若無足措意者繼洵素謹飭以是頗見惡嗣同
迺游新疆劉錦棠幕以同知入貲爲知府銓江蘇陳寶箴撫湖南嗣同還鄉佐
新政梁啓超倡辦南學會嗣同爲之長屆會期集者恆數百人聞嗣同慷慨論
時事多感動二十四年召入都奏對稱旨擢四品卿軍機章京四人雖同被命
每召對嗣同建議獨多上欲開懋勤殿設顧問官令嗣同擬旨必載明前朝故
事將親詣頤和園請命太后嗣同退謂人曰今迺知上絕無權也時榮祿督畿
輔袁世凱以監司練兵天津詔擢世凱侍郎召入覲嗣同嘗夜詣世凱有所議

明日世凱返天津越晨太后自頤和園還宮收政權啟超避匿日本使館嗣同往見之勸嗣同東遊嗣同曰不有行者無以圖將來不有死者無以酬聖主卒不去未幾斬於市著有仁學及莽蒼蒼齋詩集等唐才常字佛塵少與嗣同齊名稱瀏陽二生兩湖學堂高材生也聞嗣同死憂憤屢有所謀每言及德宗常泣下二十六年兩宮出狩才常陰結富有會謀舉事號勤王將攻武漢被獲慷慨言無所隱請就死遂殺之

林旭字暉谷福建侯官人年十九舉本省鄉試第一後試禮部值中日構衅糾同試者上書論時事不報入貲爲內閣中書時康有爲倡言變法先於京師立粵學會以振厲士氣而獨學浙學陝學閩學諸會繼之旭爲閩學會領袖又充保國會會員榮祿先爲福州將軍雅好閩士及至天津延旭入幕俄以奏保人才召見操土語上不盡解退繕摺上稱善遂命與譚嗣同等同參機務詔諭多旭起草及變起同戮於市年二十有四著有晚翠軒詩集妻沈葆楨孫女聞變仰藥不死以毀卒

康廣仁名有溥以字行有爲弟少從兄學有爲上書請改革廣仁謂當先變科舉庶人才可出其後能鄉會試制藝而歲科試未變廣仁激厲言官抗疏論之得旨俞允於是廣仁語有爲今科舉既廢宜且南歸興學專教育俟養成多數有用才數年後迺可云改革也有爲不忍去及初聞變廣仁復趣有爲歸有爲走廣仁被逮在獄言笑自若臨刑猶言曰中國自強之機在此矣

論曰戊戌變法德宗發憤圖強川端棻等言召用新進百日維新中外震仰黨爭遽起激成政變銳光第剛同旭及深秀廣仁同日被禍世稱六君子皆悲其志內爭不已牽及外交其後遂釀庚子排外之亂終致危亡此亦清代興衰一大關鍵也

清史稿

列傳二百五十

徐桐

字承煜

剛毅

趙舒翹

啓秀

英年

裕祿

廷慶

毓賢

字廷

徐桐字蔭軒漢軍正藍旗人尙書澤醇子道光三十年進士選庶吉士授編修坐修改中卷干磨勘能職咸豐十年特賞檢討協修文宗實錄同治初命在上書房行走奉懿旨番講治平寶鑑入直弘德殿累遷侍講學士先後疏請習政事勤修省成大學衍義體要以進數擢至禮部侍郎念外人膺集京師和議難恃宜壹意修攘剛自強因條上簡才能結民心裕度支修邊備四策光緒初授禮部尙書加太子少保主事吳可讀請豫定大統以尸諫桐與翁同龢等謂其未悉本朝家法當申明列聖不建儲彝訓俾知他日紹膺大寶之元良卽爲承繼穆宗之聖子揆諸前諭則合準諸家法則符疏入詔存毓慶宮備覽時崇厚

擅訂俄約下羣臣議迺條摘其不可行者曰伊塔各城定界曰新疆蒙古通商曰運貨逕至漢口曰行船直入伯都訥六年廷議徇俄人請將赦崇厚罪桐力持不可謂揆度機要在樞廷折衝俎豆在總署講信修睦在使臣赦之而彼就範猶裨國事若弊端仍不能引反失刑政大權推原禍始宜肅國憲又言今日用人之道秉忠持正者爲上宅心樸實者次之若以機權靈警諳曉各國語言文字遽目爲通才而責以鉅任未有不償且蹶者不報歷充翰林院掌院學士上書房總師傅十五年以吏部尙書協辦大學士晉太子太保二十二年拜體仁閣大學士桐崇宋儒說守舊惡西學如隸門人言新政者屏不令入謁二十四年政變後太后以其耆臣碩望頗優禮朝請令近侍扶掖以寵之有豫師者字錫之內務府漢軍進士官至烏魯木齊都統以講學爲桐所傾服方太后議廢帝立端王載漪子溥儀爲大阿哥桐主之甚力實皆豫師本謀也既而桐被命照料益親載漪各國不懷載漪等所爲漪恚甚圖報復二十六年義和拳起數仇外載漪大喜導之入都桐謂中國當自此強矣至且親遊之然及其亂時

仍被劫掠袁昶許景澄之死舉國稱冤而桐則曰是死且有餘辜時其子承煜監刑揚揚頗自得承煜字楠士拔貢以戶部小京官管遷郎中累官刑部左侍郎已聯軍入桐倉皇失措承煜請曰父茲拳匪外人至必不免失大臣體蓋殉國兒當從侍地下耳桐迺投縶死年八十有二矣而承煜遂亡走爲日軍所拘置之順天府尹署與啟秀俱明年正月正法命下日軍官置酒爲餞傳詔旨承煜色變口呼冤痛詆西人不已翼日備輿送至菜市監刑官出席禮之已昏不知人矣尋就戮和議成褫桐職奪卹典旋論棄市以先死議免

剛毅字子良滿洲鑲藍旗人以筆帖式累遷刑部郎中諳悉例案承審浙江餘杭縣民婦葛畢氏案獲平反按律定擬得旨嘉獎出爲廣東惠潮嘉道邊江西按察使調直隸邊廣東布政使調雲南光緒十一年擢山西巡撫請設課吏館手輯牧令須知諸書分講習詔飭行各省治套外屯田建分段開渠設官三策明年移撫江蘇蘇患水侵先後浚蘊藻河吳淞江以工代賑民德之調廣東二十一年召授軍機大臣補禮部侍郎二十四年以工部尙書協辦大學士疏陳實

倉廩嚴保甲能不急官二十五年按事江南及廣東諸省迭疏請籌長江防務籌餉練兵清理財政及整頓地方一切事宜詔皆飭行二十六年拳亂作命趙舒翹及剛毅馳往近畿一帶查辦解散及還京復命而宣戰詔已先下矣匪集都城肆焚殺時方稱義民亡敢誰何載漪等復疏言雪恥強國在此一舉又盛推拳民忠勇有神術可用太后愈信之因命剛毅載助統之比於官軍然匪專殺自如勿能問且擾禁城日焚劫不止詔各軍營會拏正法盡拆所設神壇並諭責剛毅董福祥親自開導勒令解散卒不能阻各國聯軍入犯兩宮西狩剛毅扈行至太原車駕欲之西安又從道遯疾還至侯馬鎮死其後各國請懲禍首以先死免議追奪原官

趙舒翹字展如陝西長安人同治十三年進士授刑部主事遷員外郎諫河南王樹汝獄承旨研辯獲平反巡撫李鶴年以下譴謫有差居刑曹十年多所纂定其議服制及婦女離異諸條能傳古義爲時所誦光緒十二年以郎中出知安徽鳳陽府皖北水浸割俸助賑課最摺浙江溫處道再遷布政使二十年擢

江蘇巡撫捕治太湖匪曾葉子春餘黨粟復爲籌善後策弊風漸革明年改訂日本條約牒請總署重民生所言皆切中是時朝廷矜慎庶獄以舒翹諳律令召爲刑部左侍郎二十四年晉尙書督辦礦務鐵路明年命入總理各國事務衙門充軍機大臣卒匪據涿州舒翹被命馳往解散匪衆堅請褫提督聶士成職剛毅踵至許之匪既入京攻使館聯軍至李秉衡兵敗太后乃令王文韶與舒翹詣使館通殷勤爲議款計文韶以老辭舒翹曰臣望淺不如文韶卒不往旋隨扈至西安聯軍索辦罪魁乃褫職留任尋改斬監候次年各國索益亟西安士民集數百人爲舒翹請命上聞賜自盡命岑春煊監視舒翹故不袒匪又痛老母九十餘見此慘禍頗自悔恨初飲金更飲以鴆久之乃絕其妻仰藥以殉

啟秀字穎之庫雅拉氏滿洲正白旗人以孝聞同治四年進士選庶吉士散館改刑部主事累遷內閣學士光緒五年授工部右侍郎調盛京刑部吉林將軍銘安被彈劾啟秀白其誣轉戶部論者以按銘安事多徇芘攻甚力命崇綺覆

按無左驗免議東省練新軍倚饗京師閔敬銘掌戶部方規節帑未應也啟秀力言始獲請歲發四十萬濟之二十年拜理藩院尙書中日和議成將換約啟秀疏請條約宜緩發先商諸各國杜後患不報放漢土達木林達爾達克鑒朝陽覆轍自請增練蒙軍言者論其苛派蒙衆謀不軌啟秀爲訟其冤赦漢王雖奪扎薩克秩而其子獲嗣以故大得蒙衆心充總管內務府大臣二十四年授禮部尙書疏陳釐正文體倡明聖學命充軍機大臣兼總理各國事務衙門啟秀端謹有風操爲徐桐所賞自政變後桐最被盼遇欲引參機務乃舉啟秀自代已而拳亂作董福祥攻使館不下啟秀薦五臺僧禦敵頗附和之逮兩宮狩西安啟秀以母病弗克從日本軍拘啟秀及徐承煜嚴守之承煜桐子也朝旨褫職而各國猶言罪魁不可縱明年正法命下日軍官置酒爲餞席次傳詔旨啟秀神色自若曰即此已邀聖恩矣肅衣冠赴菜市啟秀宅近日本權領地日官與語當善其家第曰厚意可感他無復言遂就戮

英年字菊儕姓何氏隸內務府爲漢軍正白旗人以貢生考取筆帖式累遷郎

中兼護軍參領光緒中歷奉宸苑卿左翼總兵正紅旗漢軍副都統工部右侍郎調戶部掣匪亂作以英年載瀾副載助剛毅統之載助等出示招致義民助攻使館英年弗能阻匪益橫任意戕殺官民聯軍既陷京師兩宮幸西安英年充行在查營大臣旋授左都御史行次猗氏知縣玉寶供張不備疏劾之款成各使議懲首禍英年褫職論斬羅西安獄尋賜自盡

裕祿字壽山喜塔臘氏滿洲正白旗人湖北巡撫崇綸子以刑部筆帖式歷官郎中出爲熱河兵備道累遷安徽布政使同治十三年擢巡撫年甫踰三十前江南提督李世忠本降寇罷職家居所爲橫恣裕祿疏請誅之會以事詣安慶召飲署中酒行出密旨麾衆縛斬之而仍卹其家人以是高其能光緒十三年遷湖廣總督調兩江復還鄂廷議修鐵路起蘆溝訖漢口下羣臣議裕祿力陳不可忤旨十五年徙爲盛京將軍十七年熱河奸民騷動燬教堂殺蒙人裕祿會師朝陽擊平之予優敘二十年秋朝鮮亂起奉天戒嚴坐安東鳳凰失守數被議明年調福州改授四川總督二十四年召爲軍機大臣禮部尙書兼總理

各國事務衙門會徵榮祿入樞廷遂代之督直隸義和拳起山東入直境初義和會源出入卦教乾坎二系聚黨直魯間爲臨清部生文餘孽後稱團專仇教裕祿初頗持正論主剿捕其酋姚洛奇寘之法踰歲開州傳舉烽言匪復至禽渠率斬以徇居無何毓賢撫山東縱匪匪散入河間深冀而裕祿承風指忽主撫袁世凱方將武衛軍語裕祿盍不請嚴旨捕治裕祿曰拳民無他伎緩則白消激則生變且此委瓊事何煩瀆天聽邪已而毓賢去世凱代之自興兵疾擊以故匪不敢近山東而紛紛入畿疆矣吳樞知縣勢乃宣禁傳習爲書上裕祿格不行時直隸官吏多信拳布政使廷杰獨力主勦辦嚴定州縣查緝拳匪懲戒辦法遽奉詔開缺回京匪愈橫張德成居獨流稱舉國第一壇曹福田爲津匪魁二人者炫神術爲妄妖言相煽誘裕祿不之問已復致書請饒二十萬自任滅外人裕祿馳檄召之於是二人出入節署與裕祿亢禮當是時津城拳匪至可三萬人呼嘯周衢市又以紅燈照燬衆每入夜家家懸紅燈謂迎仙姑頃之各國兵艦大集匪猶羣聚督轅求槍礮裕祿命詣軍械所任自擇盡攫以去

而聯軍絡繹登岸索大沽礮臺裕祿懼疏告急請敕董福祥來援聯軍索益堅提督羅榮光不允戰失利而裕祿且上天津團民殺敵狀於是朝廷以團民爲可恃宣戰詔書遂下而不知大沽已先數日失矣裕祿又報大捷盛張拳匪功發帑金十萬犒團更薦德成福田於朝飾戰狀獲賞頭品秩花翎黃馬褂事急官軍戰車站敗績裕祿退保北倉閱三日城陷德成福田挾貨走卒繫而罪之裕祿飛章自劾詔革職留任踰月北倉失裕祿又退楊村遂自殺和議成奪職廷雍字邵民滿洲正紅旗人以貢生累官直隸布政使裕祿死護總督聯軍入保定被執並及諸士紳各軍訊其事雍曰保紳夙從令可釋事皆由我今至此斧鉞由汝奚問爲遂見殺郡人尙多哀之

毓賢字佐臣內務府正黃旗漢軍監生以同知納賈爲山東知府光緒十四年署曹州善治盜不憚斬戮以巡撫張曜奏薦得實授累遷按察使權布政使二十四年調補湖南署江甯將軍裁革陋規萬餘兩上聞而嘉之是時李秉衡撫山東適有大刀會仇西教乘衡獎借之戕德國二教士廷議以毓賢官魯久諳

河務擢代之既莅事護大刀會尤力匪首朱紅燈搆亂倡言滅教毓賢令知府盧昌詒按問匪擊殺官軍數十人自稱義和拳毓賢爲更名曰團團建旗幟皆署毓字教士乞保護置勿問匪浸熾法使詰總署迺徵還至則謁端王載漪莊王載助大學士剛毅盛言拳民忠勇得神助俄拜山西巡撫之命於是拳術漸被山西平陽府縣上書言匪事毓賢痛斥之匪益熾毓賢更命製鋼刀數百賜拳童令演習其曾出入撫署款若上賓居無何朝旨申命保教民毓賢陽遵旨行下各縣文書稠疊教士咸感悅未幾又命傳致教士駐省城曰縣中兵力薄防疏失也教士先後至者七十餘人迺扇衆一室衛以兵時致蔬果一日毓賢忽冠服拜母泣不可止曰男勤國事不復能顧身家矣問之不語遽出坐堂皇呼七十餘人者至令自承悔教教民不肯承迺悉率出斬之婦孺就死呼號聲不忍聞聯軍既陷天津毓賢請勤王未及行朝旨趣之再兩宮已西幸毓賢遇諸塗遂隨扈行和議成聯軍指索罪魁中外大臣復交章論劾始視職戍新疆十二月行抵甘肅而正法命下時李廷簫權甘督廷簫籍湖北黃安以進士累

官山西布政使嘗附毓賢縱匪至是得旨持告毓賢毓賢曰死吾分也如執事何廷簫慮譴及元日仰藥死蘭州士民爲毓賢呼冤將集衆代請命毓賢移書止之其母留太原年八十餘矣一妾從行令自裁踰數日伏誅未殊連呼求速死有僕助斷其頸爲斂而葬之

論曰戊戌政變後廢立議起患外人爲梗遂欲仇之而庚子拳匪之亂乘機作矣太后信其術思倚以鋤敵而立威王公貴人各爲其私羣奉意旨不敢違大亂遂成及事敗各國議懲首禍徐桐等皆不能免逢君之惡孽由自作然刑賞聽命於人何以立國哉

清史稿

列傳二百五十三

徐用儀

許景澄

袁昶

立山

聯元

徐用儀字筱雲浙江海鹽人由副貢生入貲爲主事官刑部咸豐九年舉順天鄉試同治初充軍機章京兼直總理各國事務衙門累遷鴻臚寺少卿以憂歸光緒三年起太僕寺少卿遷大理寺卿直軍機如故擢工部侍郎始能直旋充總理衙門大臣歷兵部吏部侍郎授軍機大臣二十年加太子少保日朝構衅舉朝爭議和戰樞臣孫毓汶被劾能翁同龢繼入主戰益力用儀論事與同龢忤遂出樞廷並解總署事二十四年皇太后再訓政復直總署迺密薦太常寺卿袁昶會許景澄奉使還被命同入署二十六年拳禍起先是上以行新政爲中外所推而儲嗣久虛載漪旣用事陰謀廢立慮外人爲梗聞拳民有神勇仇西教欲倚以集事召入京遂縱恣不可制用儀請嚴禁遏不聽俄戕德使克林

德川俄駭曰禍始此矣言於慶親王奕劻厚斂之各國兵艦至津沽詔廷臣集議和戰用俄景澄昶及尙書立山內閣學士聯元並言奸民不可縱外衅不可啟而載漪等主戰甚力在廷大臣率依違不決用儀以太后命詣使館議緩兵當事者益目爲奸邪景澄昶先被害用儀知不免意氣自如七月既望遽發拳匪捕之於家擁至莊王邸用儀不置辯第曰天降奇禍死固分耳遂與立山聯元同乘市越三日聯軍入京而兩宮西狩十二月詔滿雪復故官宣統元年追諡忠愍浙人祠之西湖與景澄昶並稱三忠

許景澄字竹簣嘉興人同治七年進士選庶吉士授編修明習時事大學士文祥以使才薦光緒六年詔使日本遭父憂未行服闋補侍講法越之役條上籌備事宜上褒納十年出使法德意和奧五國大臣兼攝比國使務時海軍初創從德國購造鐵艦未就景澄躬歷船廠鉤稽輯上外國師船表又言海軍宜定屯埠膠州灣設鐵甲礮船大沽口轉侍讀母憂歸十六年充出使俄德奧和四國大臣累遷至內閣學士先是俄兵游獵常越界侵及帕米爾地景澄爭之俄

援舊議定界起烏什別山自此而南屬中國其西南屬俄人則欲以薩雷闊勒爲界相持三載俄始允改議其帕界未定以前各不進兵以保和好因著帕米爾圖說西北邊界地名考證爲他日界約備擢工部侍郎是時俄德迫日人還遼東景澄曰俄謀自便德圖償報事故從此多矣疏請分遣兩使從之二十三年調充德國使臣會俄建西比利亞鐵道謀自黑龍江達海參崴朝議拒之迺更名商辦許中國投資五百萬所謂東清鐵路公司也詔景澄綜其事力阻路綫南溢稽察運船毋漏稅已而俄人索租旅順充頭等公使會駐俄使臣楊儒定議俄都事竣移疾歸召授總理各國事務大臣兼禮部侍郎調吏部充大學堂總教習管學大臣意大利索我三門灣景澄抗言爭之事迺寢未幾拳禍作景澄召見時歷陳兵衅不可啟春秋之義不殺行人圍攻使館實背公法太后聞之動容而載漪等斥爲邪說聯軍逼近畿景澄等遂坐主和棄市宣統元年追諡文肅

袁昶字爽秋桐廬人從劉熙載讀博通掌故光緒二年進士授戶部主事充總

理各國事務衙門章京十八年以員外郎出任徽寧池太廣道誠寮屬抑肯吏多所興革擴中江書院齋舍課以實學建尊經閣購書數萬卷汰常關耗費歲萬八千金悉還諸公定專條納新關穀米出口稅歲羨數十萬督修蕪湖西南濱江圩隄自大關亭至魯港延袤十二里更穿築新縷隄三百七十丈自是蓄洩有資田廬完固民歌誦之膠州事起下詔求言規條列時政二萬餘言以德突據膠灣其禍急而小俄自西北至東北與我壤地相錯蒙喀四八部將折入異域其禍紆而大宜及今預練勁旅痛革吉奉華靡風習自頃兵力不能讓戰要不可不謹守我朝八旗初制文武不分途京外不分途人皆兵官皆將故人才盛國勢強承平日久文法繁密諸臣救過之不暇於是相率爲鄉愿而舉國之人才靡矣金田洪楊之亂其始一小民耳猶窮全國之力僅而克之況諸國互肆蠶食之心有不乘吾敝而攻吾之短者哉夫敵國外患爲殷憂啟聖之資苟得其人毋拘以文法則理財練兵防海交隣之策可次第就理上親書其綱要於冊下中外大臣議行二十四年遼陝西按察使未到官擢江甯布政使

調直隸未幾內召以三品京堂在總理衙門行走授光祿寺卿轉太常寺卿時財用匱議整釐稅則極言釐金明病商實病民不可議增義和團起山東屠戮外國教士昶與許景澄相善廷詢時陳奏皆抗慨上執景澄手而泣昶連上二疏力言奸民不可縱使臣不宜殺皆不報復與景澄合上第三疏嚴劾釀亂大臣未及奏已被禍疏稿爲世稱誦追諡忠節江南人祠之蕪湖昶嘗慨士鮮實學輯農桑兵醫輿地治術掌故諸書爲浙西村叢刻

立山字豫甫土默特氏蒙古正黃旗人光緒五年以員外郎出監蘇州織造歷四任迺得代論修南苑工賜二品服累遷奉宸苑卿總管內務府大臣正白旗漢軍副都統戶部侍郎二十年加太子少保盜竊甯壽宮物坐失察鑄職留任二十六年擢戶部尙書立山久典內廷同列嫉其寵眷會拳禍起驛軍至天津廷臣集議御前載漪盛推拳民可用立山適在側太后謂汝言如何立山曰拳民雖無他然其術多不驗載漪怒曰用其心耳奚問術立山必與外人通請以立山退外兵立山曰首言戰者載漪也臣主和又不諳外事不足任載漪益仇

之因其宅隣教堂適中以蜚語謂藏匿外人竟論死宣統元年追諡忠貞

聯元字仙蘅崔佳氏滿洲鎮紅旗人同治七年進士選庶吉士授檢討累遷侍講大考左遷中允再陟侍講以京察出知安徽太平府調安慶兩薦卓異署滁和道遷廣東惠潮嘉道汕頭者通商要衝也姦人倚英領事爲民暴聯元裁以法良善獲安二十四年擢安徽按察使入覲改三品京堂在總理衙門行走又明年補內閣學士拳民仇西教載漪剛毅助之勢益橫日夜圍攻使館不能下大臣負滿望者徐桐崇綺皆謂民氣可用聯元與崇綺爭論帝前謂民氣可用匪氣不可用聯軍既陷大沽載漪等猶壹意主戰聯元謂甲午之役一日本且不能勝況八強國乎儻戰而敗如宗廟何載漪斥其言不祥七月十七日斬西市昭雪後予諡文直順天府奏請立山聯元合祠宣武門外而聯元祖居寶坻更於其地建專祠焉

論曰清代優禮廷臣罕有誅爵拳禍既起忠諫大臣駢首就戮豈獨非帝意哉觀用儀諸人所論事勢利害昭昭如此迺終不能回當軸之聽何其昧焉世傳

大節並號五忠不數日而遂昭雪允哉